

أحمد
فؤاد
نجم

صور من
الحياة
والسجن



أحمد فؤاد نجم



أبو عبدو البغل

<https://facebook.com/groups/abuab/>

صور من الحياة والسجن

أحمد فؤاد نجم



mohamed khatab

تقديم

بقلم الدكتور سهير القلماوي

في هذه المجموعة الصغيرة من الأرجال التي ينشرها المجلس الأعلى لرعاية الفنون والآداب والعلوم الاجتماعية، يحس القارئ أن برعما يتفتح في عالم الزجل بقوة وإيمان وإصرار. لقد خاض المؤلف تجربة مريرة، فإذا التجربة تفتح هذا البرعم على نار الأكم والحزن، وفي السجن البارد المظلم - حيث تموت كثير من الآمال، وتذوي مظاهر الحياة - اكتسب البرعم حرارة من قلب معذب، فإذا هو ينضج على الأكم والندم، وفراق الأبناء، والزوج والأحباب، كما ينضج على آمال الشعب وتطلعه إلى المستقبل. في هذه المجموعة نرى صوراً من الحياة وأخرى من السجن، ولكنها كلها تصور روحاً شابة لابن من أبناء الشعب الأصليين يرى الحياة من حوله بأفراحها وأحزانها، فينفعل بها، ثم يرى السجن بقسوته فينفعل به، وإذا المزيج من كل هذا صرخة حارة تريد الحياة، بل تريدها حرة كريمة.

يصور أحمد فؤاد نجم الحياة في السجن بأسلوب بسيط هين، هو أسلوب الرجال ولمسات منتقاة، وينتخب ألفاظاً من قاموس الواقع والمتحدثين، فإذا الصورة تتبض بالحياة الطلقة الحرة، تطابق الفن وتحافظ على الأمانة للواقع. ففي السجن "سجان" هو رجل صديق. وفيه "مدير" ترفع إليه طلبات المسجونين وتظلماتهم، وكثيراً ما يستجيب في كرم لها (طلب لمبه) وفي السجن رفاق قد لا يتجاوب شعوره معهم في عمق خارج السجن، ولكنهم في داخله أخوة لطول العشرة ووحدة الأزمة.

ولكن في السجن شقاء هو الشوق إلى ما في خارج السجن من حياة تكسوها أضواء الحرية بكل جمالها وطبيعتها. حياة الجماعة وحياة الأسرة. ووجوه حبيبة تطل على ظلام السجن وجوه الابن (بابا) والابنة (بنتي) والزوجة والأم (عيد الأم) وخارج السجن مواسم وأعياد تلقي ظلالاً كنيية على جدرانه، ولكنها تقجر في صدر المسجون حرقة وألماً "سجين يخاطب العيد" والعيد يذكر بالأهل وبالألم وهي نقطة الارتكاز وعماد الأسرة فيناجي السجين "أمه في العيد".

ولكن في السجن بعض الحياة، فهذه مجلة ينشر فيها قصيدته "عيد الأم" فينال عليها جائزة ويكرمه مدير المنطقة فينتطلق الشاب يتغنى بالمناسبة. ويأتي "عيد القيامة" وفي السجن أخوة مسيحيون فيهنئهم بالعيد.

وهذه مدة السجن تنتهي، وغدا يخرج السجين إلى الهواء الطلق، إلى الحياة، إلى الأحبة، ولكن ألم يألف هذا السجن؟ ألا يحس الزهبة والخوف لمواجهة الحياة من جديد؟ ماذا بها مما سيرحب به؟ وتتفجر العواطف المضطربة بشعر يودع فيه السجن (الوداع) و "بخاطر قبل الإفراج" وهناك "بلبل" يغنى، فلتغن يا بلبل وهناك شروق ولكن ما بال السجين ليس فرحاً كل الفرح، وهذا هو يؤكد لنفسه "أنه فرحان" ولكن أحقا هو فرحان؟

وما يكاد يخرج من السجن حتى يلقي الظلال السود التي مدها على حياته، وإذا أبواب العمل تقفل في وجهه. نعم إلى حين، ولكن من كان يدره أن هذا الشقاء إلى حين؟ وهنا ينفجر في أزمته تلك بأحسن قصائده "صحيفة الفيش".

والشاعر إنسان، وكل إنسان يفجر الحب في نفسه معاني كثيرة، وتمر بالمحب ساعات فرح وساعات آلام، وأشد هذه الآلام آلام الفراق. والسجين خير من جرب آلام الفراق، وآلام الفراق أكثر ما يفجر الشعر عند المحبين، وإذا شعر أحمد فؤاد نجم الغزلي يفيض بشكوى الهجر، ولكنه يفيض أيضاً بالحب السعيد والشوق والغزل، يعتمد على الحركة والحدث أكثر مما يعتمد على الوصف المادي للصور الصامتة.

فهو في عزلة يتحرك في سرعة، فهذه "حكاية قلنين" و "لقاء" و "بعد هجرك" و "يا ضي العين" و "كفاية". وهو أحياناً في قصته يكرر الموقف البارز بعد كل خطوة والموقف حركة كما نرى، ففي لقاء يكرر و "انقلابنا" ولا يكرر وصفا جامداً أو إحساساً من زاوية الوصف وحدها.

ولعل أبرز ما في هذه المجموعة إيمان الرجال بالشعب وبالكفاح، واستبشاره بالمستقبل وهو لا يؤمن بذلك عاطفياً فحسب، وإنما هو واثق عقلاً بما يريده الشعب وبالطريق الذي سيوصله إلى ما يريد، ففي قصيدته طريق الكفاح يكرر "أنا الشعب ماشي وراسم طريقي" ويتجلى إيمانه بالشعب في سخط على من ابتزوا عرفه واستحلوا جهده "الأرض" كما يتجلى في حب لأفراده ولعاداتهم ولحياتهم البسيطة القوية.

"أحمد غريب" و "زفة العروس" حيث نحس نبضات قلب الشعب قوية طيبة خيرة. ولا ينسى إخوانا له من العرب وإخوانا من الإفريقيين يخرجون مثله من سجن رهيب، وما زالت أغلالهم عالقة بأقدامهم تعوق حركتهم الحرة. "صرخة أفريقيا". وهكذا نجد في هذا الديوان موهبة أصيلة تنتسم عبير الانطلاق نحو الآفاق لتحلق فيها. موهبة متفاعلة بما حولها متعمقة ما في نفسها محاولة بهذا وذاك أن تخرج لنا صورة من الحياة ولا أريد أن أذهب مع المؤلف فأقول: وصورا من السجن؛ لأن صور السجن عنده كانت مفعمة بالحياة مشربة بالأمل معبأة بالثورة والسخط في طريق السلام والبناء لا طريق التدمير والتخريب؛ لذلك أراها كلها صورا من الحياة: الحياة بأفراحها وأتراحها وأزماتها وتطلعاتها. ولعل الشاعر وقد صحح وضعه في الحياة وأجد من ظروفه اليوم ما يغذي ملكته، ويفجر شعره، ويغني تعبيره عن الحياة، فيخرج لنا دواوين كلها صور من الحياة.

حكاية هذا الديوان

ياااه: كل هذا الألم في كتاب واحد؟!

ومع هذا كان هذا الكتاب هو الباب الملكي لدخولي إلى عالم الشعر والشعراء.. عالم أكثر رحابة، وأيضاً أكثر تعقيداً من عالم السجن الضيق المحاط بالأسواق والحراس الشداد والغلاظ.

صور من الحياة والسجن مع هذا كان هو القشة التي تعلقت بها هرباً من الضياع النهائي..

ولقد كان يوم ١١ مايو سنة ١٩٦٢م هو موعد إعلان ميلاد صور من الحياة والسجن في الملحق الأسبوعي لجريدة الأهرام.

دوى في العنبر ب سجن أرميدان صوت: انتبأااه.. كانت الزنازين لم تفتح أبوابها بعد في هذا الصباح.. وسارع المساجين في إخفاء الممنوعات انتظاراً للتفتيش، وفجأة دار المفتاح في باب الزناينة الكبيرة رقم ١٦ - ٤ وانفتح الباب عن مدير السجن اللواء إبراهيم عزت ومعه المأمور - الأديب - الرائد سمير قلاده غطاس، وخلفهم الصول عوض والشاويش عبد الغفار، واتجهوا جميعاً نحوي خلف المدير الذي وضع يده على كتفي وهو يقول:

- مبروك.

- الله يبارك في سعادتك.

فقال مبتسماً:

- إنت عرفت؟

- طبعاً ما أنا إفراجي النهارده.

- لا إفراج إيه! أنت ما قريتش الأهرام؟

فقلت:

- أصل الواد بتاع الجرايد لسه ما عداش من هنا

وضحك المدير فضحك الشاويش مش عارف ليه؟! وناولني المدير ملحق الأهرام وأشار إلى الخبر الأدبي الذي يقول:

- في مشروع مسابقة الكتاب الأول، فاز ديوان صور من الحياة والسجن للشاعر أحمد فؤاد نجم.. ولم أقرأ ما بعدها

وسمعت صوت المدير يأتي من بعيد:

- دلوقتي أنت حطيت رجلك على بر الأمان

وخرج الكتاب - البكري - إلى الناس ليوزع مجاناً بمعرفة مجلس الفنون والآداب والعلوم الاجتماعية، وقد عرفت فيما بعد

أن "صور من الحياة والسجن" أثار معركة أدبية في لجنة الشعر بالمجلس؛ لأن الأستاذ عباس محمود العقاد والشاعر عزيز باشا أباطله والشاعر مش عارف مين وقفوا ضد طبع الديوان على نفقة الدولة؛ لأنه مكتوب باللغة العامية، وهم يرون أن الشعر يكتب باللغة الفصحى وإلا فلا!

فتصدى لهم كل من عمنا العظيم بيرم التونسي والأستاذ محمد فريد أبو حديد، والدكتور سهير القلماوي واستطاعوا أن

ينتزعوا النصر النهائي فيصدر هذا الديوان الشقي انتصاراً للغة الشعب، مبدع الكلام وأعظم المتكلمين.

ونسيت هذا الديوان، وأصدرت مجموعة كبيرة من الدواوين لاهت نجاحات متوالية لم يلقها هذا الديوان.

وذات ليلة دخل عليّ الصديق خالد عبد الله وفاجأني بهذا الديوان الذي ظننت أنه اختفى إلى غير رجعة بعد أن تحول

إلى ورق لف عند الطعمجية ومقالي اللب والبقالين.

شكراً للصديق خالد عبد الله على العثور على "صور من الحياة والسجن" وشكراً للقارئ الذي سيتحمل "صور من الحياة

والسجن".

أحمد فؤاد نجم

مقدمة

الحياة.. هذا اللغز الغامض الذي حير الأفهام.. متى وكيف ولماذا بدأ؟ وأين ومتى وكيف ينتهي؟

الحق أن هذه الأسئلة الحائرة سوف تظل تتراقص في الفضاء دون أن نجد لها الجواب الصحيح.

صحيح أننا الذين نصنع الحياة، ولكن هل معنى ذلك أننا نسيرها حسب هوانا؟ كلا.. فالواقع أننا نصنع الحياة بتوجيه من الحياة نفسها، فنحن نمشي ونقف ونأكل ونتكلم ونضحك ونبكي، وبذلك نصنع مظاهر الحياة، بيد أننا لا نفعل ذلك بمحض اختيارنا!! أعني أن أيامنا لا يستطيع خلق الظروف التي تضحكه أو تبكيه، وإنما نحن نضحك ونبكي حسبما تقتضي الظروف التي تحيطنا بها الحياة نفسها.

إننا صور من الحياة تتحرك وتتابع، تضيء وتذهب، ولكن بعض هذه الصور يترك أثراً عميقاً في ضمير الحياة.

ونحن كجزء من الحياة نتأثر بما تتأثر به الحياة نفسها، ونكون في مجموعتنا كل الحياة.. نحن كذلك، تحفر بعض الصور خطوطها على صفحات نفوسنا، بحيث تصبح قطعة منها.

ومن على صفحة نفسي أنقل هذه الصور التي ما زال أثرها باقياً على ضميري.. فإلي الصور التي تتكون منها الحياة أقدم "صور من الحياة".

أحمد غريب

- ١ -

أحمد غريب في حنته يكسب كثير من شغلته	جدع ومالي هدمته لكن يحب الفنجره
*	*
كان أصله شغال طعمجي صبح معلم كفتجي	في محل طه الحلوجي والحال معها متيسره
*	*
عربية حلوه محندقه والراديو فيها شوف بقى	من كل ناحية مزوقه عروسة واقفة منوره
*	*
ساعتين ليلاتي وقفته وبروح يكمل سهرته	يبيع وتجبر وجبته بهجوم نضيفه مزهره
*	*
يلقى الصحاب مجتمعين ريس عموم البنانيين	عند ابن خالته حسين أمين والجوزه دايره مبكره
*	*
ياخد مكانه باحترام ينصت في غاية لنسجام	بعد التحية والسلام للي حصل واللي جرى
*	*
وعم جودة يقول لهم عن لنجليز وحكمهم	على كل حاجة تههم وعن حريق القاهرة
*	*
ويعد سهره مجلطة بروح بولاق أبو العلا	يقود دماغه مصلله بيتهم في درب المندره
*	*
تفتح له حالا والدته يخش يلقى فرشته	أول ما تسمع خبطته نضيفه حلوه معطره
*	*
وف ليلة من بعد العشا قالت له عندي في مهمشه	ضمن الكلام والدردشه عروسه حلوه صغيره
*	*
حلاوة فاقت حدها أما الحسب فجدها	لا قبلها ولا بعدها عباس بتاع الكزيره
*	*

أنا اتفقت مع امها الضهر حنكون عندها	بُكره حنطلب يدها ومعانا خالتك سكره
ويعد قولها وشرحها سيبي الحكاية لوقتها	ضحك حماده وقال لها ليه بس يا امه مبدره
يا امه الجواز مش لي أنا سيبيني قيمة كام سنه	أنا أصلي غاوي الجدعنه بلا جواز بلا مسخره
الست عيشه أم اسماعين وجوزها جاد عبد المعين	ساكنه في درب الشماعين شغال تمرجي معتبر
ومخلفه سمعه وكمال البنث إيه في الجمال	وعروسه سموها دلال طلعتها أجمل م القمر
شبان حارتهم كلها الكل طالب يدها	يتمنوا نظره منها بس النصيب بس القدر
صبحت دلال مبدره والست عيشه محضره	مسح وغسيل في المندره أكل الضيوف المفتخر
والطبله في إدين العيال جالها العريس ابن الحلال	بيغنوا يوم خطبة دلال والحاره سمعت بالخبر
وشويه والبيت اتملا وثر يا بنت أبو العلا	نوسه وخديجه وفلفله ونقيسه محمود الذكر
مبروك يا خالتي أم دلال عقبال سي سمعه وسي كمال	مبروك عليها ابن الحلال دا اليوم ده هو المنتظر
زغروطه حلوه يا بنات عقبال خطوبتك يا عنايات	وسمعونا الأغنيات إنت وبنات الشيخ قمر
دلال يا حتة سكره يا ورده حلوه صغيره	يا شمعنه قايدة منوره خطيبك اجمل م القمر

والطلبه طالت والغنا	والإنتظار يومه بسنه
الست عيشه من هنا	خافت وحست بالخطر
*	
يا فضيحتي فات وقت الغدا	ولا جوش يا بت يا سيده
يا خوفي تشمت العدا	يا دي النكد يا دي الكدر
*	
والطلبه بطل دقها	وام اسماعين زاد همها
لكن دلال بان فرحها	والمولى يعلم بالخبر
*	
واللبه فانت في الخناق	ومنين حبصل الوفاق
وعيشه وقفت عالطلاق	لكن سي جاد بس انتظر

-٣-

ومرت الأيام قوام	وبعد بيحي نص عام
في الموسيقى وف قلب الزحام	كانت دلال ويا امها
والموسكى زحمه يا مغيث	*
بالصدفه شافوا أم العريس	ويومها كان يوم الخميس
	راحوا قوامك يمها
*	
كانت مقابله يا سلام	الردح فيها كان تمام
من غير سلام ولا كلام	ألفاظ محرم نكرها
*	
يا وليه يا عديمه الشرف	أصلك خلاص بان وانعرف
بقى دكلام؟ جنك القرف	ميلتي بنتي ويختها
*	
قالت لها أم احمد غريب	يا أم اسماعين كفاية عيب
دنا حالي يصعب عالغريب	وحكايتي يطول شرحها
*	
يوم ما اتفقنا عالفرح	من يومها وأنا قلبي انجرح
أحمد طلع م البيت سرح	ما رجعت ثاني بعدها
*	
من يومها فانتى لوحدي	أقاسي وعدي وقسمتي
لا حد شايف دمعتي	ولا حد عارف سرها
*	
الست عيشه دمعتها	قوام جري على خدها
سكتت كده وبصت لها	غلبتها طيبة قلبها
*	
قالت لها ولا تسألني	

شبانہ جوز أم علي	لا تفكري ولا ترعلي
ابنك كبير يا منجده	كان غاب كثير ورجع لها
وحياة مقام السيده	ما هوش كده ولا كده
ودلال تقول يا عمتي	ربك قوام حيكلها
لازم تكوني ف زفتي	الليلة ليلة دخلتي
سكينه مزعت جنبها	بيكي حيكمل حسنھا
كتمت همومها في قلبها	عشان عروسة ابنھا
مبروك يا حلوه دخلتك	وقالتھا غصبن عنها
وبديم عليكي بهجتك	يا رب تمم فرحتك
ستين يمين حلفوه لها	من قلبي والله قلتها
وعشان تريح رجلها	وخدوها غصبن عنها
البيت في درب الشماعين	عريبه كارو لجلھا
مفتوح لكل المعزومين	نمرة تمانيه واربعين
نور الكهارب أبهه	والزينة حاجه ما قيش كده
دي لمبه حمره وجنبھا	حاجه بديعة ف شكلھا
والزفة ماشيه بانتظام	ألوان كثير من ده وده
والحور على الصفين زحام	منظر تلمه العين قوام
	لبلى وصفيه وسيده

زفة العروس

يا فرحه زيدي واكبري
هاتي هناكي وكتري

يا شمعہ قيدي ونوري
وانتي يا ليلة عمرنا

الورد زاین خدها
ميلي يا حلوه واخطري

يا شمعہ قيدي ونوري
ست العرايس كلها
والشمع غني وقال لها

ضلل علينا كلنا
مين اللي عايز يشتري

يا شمعہ قيدي ونوري
السعد كله والهنا
والفرح جانا وقال لنا

وسمعونا الأغنيات
وبالبنين تبكري

يا شمعہ قيدي ونوري
زغروطه ياللا يا بنات
يا رب تمم بالبنات

ج

الحسن زانك والجمال
حتشرفي وتعمري

يا شمعہ قيدي ونوري
ست العرايس يا دلال
والعقل زادك بالكمال

يا شمعہ قيدي ونوري

-٦-

وعقلها فاتها وسرح
جرحه ما حدش يعلمه

أم احمد قاعده في الفرح
أما الفؤاد اللي انجرح

*

للغلب ده وازاي حصل
والكل قاموا يسلموا

إزاي يا ناس حالي وصل
وشويه والعريس وصل

*

أول ما بصت يمته
والناس شافوها بلّموا

بصت له حالا عرفته
صرخت وقامت مسكته

*

إيه اللي خلاك سبتني
خليت جيرانني اتكلموا

إني ضنايا ضمني
كده برضه يا احمد بعثني

*

أحمد سكت والدمع قال

أنا روجي يا امه في إيد دلال

كلام كتير عالخد سال

وانتوا ما كنتوش تعلموا

*

سامحيني يا امه واصفحي

دننني ما ترضيش تجرحي

وحطي نفسك مطرحي

في الحب قلبين سلموا

*

قالت له امه يا غبي

دنا كل قصدي ومطلبي

ما هي دي العروسة والنبي

تعيشوا لي وتسلموا

فرحة الختام

دقوا الدفوف حنوا الكفوف الليلة

خلوا الحبايب يعملوا هليله

دقوا الدفوف

ميروك علينا السعد ده والفرحه
وانتي يا حلوه باللي تحت الطرحة

يا رب تمم بالهنا طوالي

الله يصونك من عبون عزالي

دقوا الدفوف

أجمل عريس اختار عروسه جميلة
زغروطه يا للا يا بنات العيلة

شوفوا الجمال ازاي بقى متجمع

خلوا اللي حاضر واللي غايب يسمع

دقوا الدفوف

خلوا اللي قال الحب ما بيجمعش

يسمع غانا واللي ما بيسمعش

دقوا الدفوف حنوا الكفوف الليلة

يشوف جمال الفرحة جوه عنيانا

بيجي يشوف الحنة ماله إدينا

خلوا الحبايب يعملوا هليله

ختام

إلى الذين لن يقدّر لهم أن يروا تلك الصورة القائمة؛ صورة السيد الذي يملك الأرض بما عليها ومَن عليها.
وصورة العبد الذي يمتزج عرقه ودمه بتراب الأرض الطيبة، ومع ذلك يعيش محروماً من خيراتها. إلى الأجيال القادمة
أهدي هذه الصورة.

فلاح يخاطب إقطاعياً

يا اللي نايم في الحرير	إنت مين وابن مين
شيء ما يحلم به الفقير	يا للي بتاكل كلابك
والفقير برضك أخوك؟	إنت مش آدم أبوك؟
إنك أنت شيء كبير؟	ولاً أهلك علموك

*

واللي غازل كل فتله فيه صباي	الحرير اللي أنت نايم فيه بتاعي
كل ده من صنع إيدي.. من دراغي	والنعيم اللي أنت عايش تحت ظله
واحنا من طين البرام؟	إنت مخلوق من رخام
لو يساويك الفقير؟	ولا يعني شيء حرام

*

وابن اخويا انهذ حيله وعضمه بان	ترمي خيري للكلاب وابني جعان
وامي واختي ملقحين جنب الحيطان	واللي أدهى فوكس نايم عا السرير
النظام ده ف أنهو دين؟	الكلام ده يرضي مين
عقلي شت ورح يطير	فهموني يا مسلمين

*

حبة القمح اللي هي قوت عيالي	زهرة القطن اللي مصت دم خالي
تاخده إنت تبعتره ف سهر الليالي	خير بلدنا اللي بعرقنا رويناه
لما قوت العيلين	يبقى فيه العدل فين
فين يا ناس عرق الأجير؟	تاخده مني ف غمض عين

*

اعصروها تلاقوا دمي بين ترابها	أرض أبويا.. أرضنا واحنا صحابها
عضمتين وبيشهدوا عالي اغتصبها	انبشوها تلاقوا عمي جنب جدي
مش لشللة بلطجية	أرض أبويا وخيرها لي

جدي قاللي الكلمة دي

قبل ما يروح الغفير^١

^١ المقصود جبانة الغفير .

طريق الكفاح

منذ مئات السنين وهو صامد، وتكالبت عليه كل العوامل والظروف فلم تستطع أن تتال من عزمته، أو تغير معدنه أو تمسح من شخصيته.

لقد انصهر أكثر من مرة في بوتقة المحن، وكان في كل مرة يخرج صلب العود، نقي المعدن، متجدد العزيمة. كل قوى الشر التي على الأرض كم تجمعت ضده! وكم وجهت إليه من ضربات الحقد المجنونة ثم عادت تجر أذيال الهزيمة والعار وهو يشيعها بنظرات السخرية والاستهتار!

يا له من مارد جبار! ويا لهم من أغبياء صغار!

لقد أخرجوا له كل ما في جعبتهم من ألأعيب صيبانية يقصدون تخويفه، فكان يتسلى بإلقاء النظرة الساخرة منهم وهم يلعبون كأطفال صغار.

فإلى معدنه الأصيل النقي؛ إلى عزمته الفولاذية، إلى شبابه المتجدد؛ إليه هو، إلى صانع المعجزات، إلى مصدر السلطات، إلى ماضيه المجيد وحاضره المليء بالكفاح، إلى مستقبله المبشر بالنجاح، إلى الشعب الذي يشرفني الانتماء إليه.. أهدي هذا العمل المتواضع.

طريق الكفاح

أنا الشعب ماشي ورأسم طريقي
سلاحي كفاحي وعزمي صديقي
أنا الشعب ماشي ورأسم طريقي

*

كفاح أقوى منه شبابي وعزيمتي	بداية طريقي صلابة وكفاح
يتوج كفاحي ويعلا بكرامتي	نهاية طريقي عارفها.. نجاح
ولو عرقلوني عزيمتي معايا	ولو جوعوني كفاحي غذايا
عرفها عدوي في يوم القتال	عزيمه تحطم وتبني الجبال
مصمم مسلح بأمضى سلاح	ماشي لآخر طريق الكفاح

معالم طريقي أساعد صديقي

أنا الشعب ماشي ورأسم طريقي

كفاح أقوى منه شبابي وعزيمتي	بداية طريقي صلابة وكفاح
يتوج كفاحي ويعلا بكرامتي	نهاية طريقي عارفها.. نجاح
ولو عرقلوني عزيمتي معايا	ولو جوعوني كفاحي غذايا
عرفها عدوي في يوم القتال	عزيمه تحطم وتبني الجبال
مصمم مسلح بأمضى سلاح	ماشي لآخر طريق الكفاح

معالم طريقي أساعد صديقي

أنا الشعب ماشي ورأسم طريقي

*

أنا الشعب ماشي ورأسم طريقي

سلام للبشر في جميع الوجود	أمالي سلام ومحبه ومصانع
ودنيا من الحب مالهش حدود	ودخان مداخن وتاجر وصانع
بعلمي وفني ألبني الإشارة	أشارك وأبني في صرح الحضارة
بكدي بعرفي بروحي بدمي	أنا الشعب صانع وجودي بعزيمتي
مصمم مسلح بأمضى سلاح	ماشي لآخر طريق الكفاح

معالم طريقي أساعد صديقي

أنا الشعب ماشي ورأسم طريقي

حكاية قلبين

مره زمان
وأنا سهران
سهر الحب ليلتها معايا
قاللي حكاية
كان يا ما كان

كانوا قلبين والناس شاهدين
متعاهدين
زي الفرح ولون الحنه
دايما دايما متواعدين

بيتقابلوا ويصونوا الود
والعزال على باب الجنه
كانوا واقفين
زي الشوك حوالين الورد
شافوا الحب وعرفوا غلاوته
بين قلبين
داقوا الود ولجل حلاوته
بقوا حبيبين

شبت نار الغيرة عليهم
شفت لهيبها جوه عينيهم
واتفقوا العزال على فكره
من قساوتها تبكي القلب
قالوا: نفرق بينهم بكره
وندوقهم نار الحب

القلبين ماكنوش داريين
بالعزال ولا باللي قالوه
كانوا هايمين في نعيم الحب
عصفورتين في الهوى طابرين
كل كلام الناس نسيوه
مش فاكرين غير كلمة حب
سكت الحب وبقي يتأمل

وأنا بسمع له وابص عليه
شفت دموعه ماليه عنيه
قلت كفاية يا حب كفاية
ما تكملشي.. ما تفرقشي
دنا مجروح وجراحي معايا
ما بتدبلشي.. ولا ترحمشي

وحياتك وجمال معانيك
ما تعذبش قلوب دابوا فيك
جمع دائما فرح دائما
واسعد كل الناس وياك
دنت حبيبنا وملو قلوبنا
ضي عنينا يا حب فداك

أنا والدنيا والناس

أنا بقول الزجل والكل عارفيني
حتى الطيور عالشجر إسألها عن فني
الإمري والكروان والبلبل النشوان
بتقول كلامي أنا ساعة ما بتغني

بيني وبين دنيتي دم وعداوة وتار
جارت على قمستي والهـم أصبح جار
وشفت منها العجب من غير سبب ألوان
والدهـر بيا غدر مع إني مش غدار

طفولتي كانت شقا فجر الحياة كان ليل
اليتـم فيها التقى ويـا الأسى والويل
اتجمعوا كلهم على حضرتي الغلبان
حرموني طعم الهنا وهـؤوا مني الحيل
رضعت طعم الألم ومرارة الحرمان
وساروا ويـا الدما في العرق والشربان
معرفش إيه السبب ومنين حنان قلبي؟
وازاي أنا اشرب أسى واسقيه لغيري حنان

طول عمري قلبي كده طيب ما هوش قاسي
يزعل عشان دا ودا في المحنه ويواسي
والقاء وأنا في بلوتي يفرح مع الفرحان
ما شفت غيري شرب ولا مره من كاسي

الصبر مني اشتكى ولا عدش راضي بي
لا العين بترضى البكا ولا حد داري بي
بنام على شكوتي واكتمها في قلبي
واداري نار شمعنى راضي بتعذيبى

طبعي أحب الصفا واعلم الجهال
واجري ورا المعرفة لو حتى في الأدغال
والحق له منزله عندي ما تتقدر
واحمي الضعيف م القوي مهما أشوف أهوال
بيني وبين الهنا ما طرق الحداد

أمشي له خطة أنا يبعد لي هو بلاد
الدنيا حالها كده تدي اللي مش عايز
أما اللي يطلب غنا الفقر بالمرصاد

الدنيا حالها عجب وماشيه بالمقلوب
القرش فيها غلب واللي عداه مغلوب
سجدوا له زي الصنم أصبح إله قادر
يكتب كلام انكتب ويغير المكتوب

شفت الجباه تتحني للمال وصاحب المال
هامات رجال تنتني بقى دا كلام ينقال!
وشفت يا حسرتي عالم أديب فنان
ما حد بيه علشان فقير الحال

عمري اللي فات وانقضى ضيعته عالخلان
والعزم مني مضى أساعد الإخوان
وأقابل السيئة بالصفح وأسامح
دا الشر مهما على أوطى من الإحسان
غلي انكتب والسبب حوّا وأفعالها
حوّا سبب محنتي باللي بتسعى لها
إمشي في طريقك عدل وان شفتها حوّد
إوعي تميل يمها لتروح ضحية لها

أعيش واحب واميل واهوى الجمال مطبوع
مع إني حظي قليل في الشكل والموضوع
بيقولوا شكلي غلط طيب وجعمل إيه؟
الصنعة مش صنعتي أنا زيههم مصنوع
اللي وهب للناس الحسن على ألوان
خلقتني ولا نسنساس في جنبنة الحيوان
هو اللي رايد كده وأنا بإيدي إيه؟؟
الغلطة مش غلطتي دي حكمة الفنان

لقاء

إتقابلنا بعد ما طال الغياب
والهوى رفرغ علينا
بالمحبة والأمني
والوداد يوم ما التقينا
انكتب له عمر ثاني
واتقابلنا
يوم لوأنا غنت الأطياف معنا
والحبايب من جمال ساعة صفانا
واللي باقي بعد ما اتجدد هوانا
والزهور عالغصن رقصت في الخميله
نسبوا نار البعد والفرقة الطويلة
يا حبيبي نحيي أيامه الجميلة

بالوداد الحلو ثاني
والمحبة والأمني
دا الهنا يوم ما التقينا
انكتب له عمر ثاني
واتقابلنا
يا للا نحكي للقمر غنوة لوأنا
أنا فاكرك لما شاف أيام هنانا
يا للا قول له يا حبيبي بالأمانة
نملا نوره بالمحبة والوداد
برضه شاف حيرتي وذلي في البعاد
عن هنا القلب اللي نال كل المراد

بالوداد الحلو ثاني
والمحبة والأمني
دا الهنا يوم ما التقينا
انكتب له عمر ثاني
واتقابلنا

كان هواك في القلب جارف وانت عارف
إن حبك عندي أغلى من حياتي.. ياما سهرت بك أمالي
وانت خالي والليالي كلها سمعت آهاتي
ياما طمعت الأماني بالتداني.. ياما منيت كل أيامي وساعاتي

بالوداد الحلو ثاني
والمحبة والأمني
دا الهنا يوم ما التقينا
انكتب له عمر ثاني
واتقابلنا

أم النجرو

راجل نحيف أسمر والشهره أبو سكر	في البوسطة في الأورمان الإسم علي عثمان
*	
أبيض على أسود ما تقولش رأس هدهد	شعره عجيب ألوان واقف ولا الخرزان
*	
أوسع من المطلوب امسك له ميكروسكوب	وقورته تيجي ميدان وعنيه عاوزها تبان
*	
ما تقولش سور الصين نازل على الخدين	بينهم وبينك سور مصنوع من البنور
*	
كوز الدره أصغر حاشيينه دبش أصفر	وانزل على المناخير والبق زي البير
*	
متفصله مخصص ورقبته رفع البوص	ودقن علوه يا ناس أكبر من القلقاس
*	
على بنطلون فاقع بس العرق ناقع	لابس قميص كستور يظهر عليه دمور
*	
والحق لو يتقال العيره بالأفعال	أدي هيئة أبو سكر العيره مش مظهر
*	
من كل عارفينه والكل قاصدينه	أبو علوه كان محبوب وفي شغله كان مطلوب
*	
بيقول يا عم علي برضك يا عم علي	اللي في إيده رساله واللي بكعب حواله
*	
بالرغم من سنه حيفهمك عنه	شعلة عمل ونشاط اسأل علي الخياط
*	
لجل استلم عملي	أول ما رحى هناك

قاللي أنا وياك	لو كنت تحتاج لي
*	
شغلك خفيف وظريف	اوعلك تشيل له هم
خليك تمللي لطيف	لا تخاف ولا تهتم
*	
الشغل مش بيع	الشغل عايز تقل
عايزك تكون مجدع	وتكون في غاية العقل
*	
قلبي اطمأن إليه	وفتحت له قلبي
لا بقيت اخبي عليه	وازاي أنا اخبي
*	
على قلب مفتوح لي	على حب على إخلاص
لم شفته من أهلي	بقي هو يعني خلاص
*	
وقول بقينا صحاب	واكثر كمان حبه
ما فيش ما بينا حجاب	ولا سر يتخبي
*	
ويوماتي نمشي سوى	لحد قصر النيل
عشان نشم الهوى	هوى العصري جميل
*	
وكان لنا عاده	في محطة التحرير
عبده علي زيادة	واقف بطشت فطير
*	
وفطيره يتاكل	فشر حمام الشام
نروح هناك ناكل	ونقول في أي كلام
*	
وف يوم من الأيام	قال عبده يا اخوانا
أنا عندي ليكو كلام	بس اللي يفهمنا
*	
والبركة ف علوه الورد	أملني عليه كله
ودا مشكل فاق الحد	هو اللي حيحله
*	
فيه عندنا وليه	وجوزها راجل كلب
راجل عديم نيه	وساقياها كاس الغلب
*	
مشبوكة هي معاه	ومخلفه النجرو

ما هي أصلها واخذاه	واهااليها ما يدروا
*	
والأمر واللي فيه	إزاي نخأصها
وجوزها أصله سفيه	مش راح يطلقها
*	
عايزين له شغلانه	والبركه ف عم علي
ودي ست غلبانه	انجدنا يا عم علي
*	
أبو علوه بيتبسم	ويبص لفطيرته
وعنيه بتكلم	من تحت نضارته
*	
طبطب عليه قال له	أنا كلي تحت الأمر
الندل ده حقاله	وانهي معاه الأمر
*	
إديني عنوانه	أعمل له ترتيبه
حكتب على جناحه	يا عبده يا حبيبي
*	
دنا علوه يا عبده	معروف في كل مكان
وجوزها أنا قد	وقد ميه كمان
*	
وعبده يدعي له	ويردد الدعوات
واداه ف منديله	بيجي سبع فطيرات
*	
خدم علي على طول	ولا قالش متسكر
وعبده كان بيقول	في الخدمة يا بو سكر
-٢-	
تاني يوم مالفيتش أبو سكر	في المكتب ليه معرفش
ووقفت ساعتها أفكر	ليه بس يكون ما حضرش
*	
الحق أنا خفت عليه	م الموضوع اللي أنا فاكره
ليكون حاجة حصلت ليه	ضربوه عند أم النجرو
*	
ما هو رايح عامل قاضي	في مشاكل ما تخصصوش
أنا شفت المكتب فاضي	في غيابه ولا طفتوش
*	
بلغت أجازة عرضيه	وافقوا لي عليها يومين

والمندت إلى شهرين	وقلبتها كده مرضيه
*	
بصيت لايو علوه اتغير!!	ورجعت من المرضية
وايو سكر شاب صغير	البدلة عليه مكوية
*	
والكرافته بدبابيس	شعره بالزيت متسرح
فاتتي وركب الأوتوبيس	وف وقت ما جينا نروح
*	
وأنا فكري بعلي مشغول	ولوحدي مشيت مشواري
ولغاية قصر النيل	وبقيت ماشي منيش داري
*	
عند ميدان التحرير	بصيت على عبده زياده
واقف ببيع ف فطير	ولقيته زي العاده
*	
ولقيت قدامه جيش	حودت أنا دوغري عليه
وعمل إنه ما شافنيش	بص لي من طرف عنيه
*	
قال أهلا مرحبتين	قلت له مرحب ياابو عبده
واحشيني انتم لتنين	فين غايب طول دي المده
*	
قال أقصد علوه الكلب	قلت له تقصد علي مين
الرفدي.. ابن ال....	راجل خباص ولعين
*	
قال لي الموضوع إياه	قلت له مش فاهم.. اشرح
قام قال لي ما هو انت معاه	قلت له من فضلك وضح
*	
الراجل الندل الساهي	فاكر موضوع الست
قلت له أبدا والله	أنا عارف انت والست
*	
لكن موضوعك فاكركه	أنا كنت بعيد م الشغل
إتجوز أم النجرو!	قام قال لي الراجل الندل

كفاية

كفاية العذاب اللي شفته كفاية الجراح اللي عاشت معايا
نسيتك خلاص ويان لي خلاص

من الحب كله.. وأدي الحكاية
*

قابلتك وقلبي من الحب خالي لا شاغل شاغلني ومالي خيالي
ولا فكر سارح ولا سهم جارح بيلعب بقلبي في عز الليالي

وساعة عيونك ما قابلت عنيه
يا عيني علياً
*

بنظرة نسيت اللي فات واللي كان وضاع عمري كله مع الذكريات
وصورتك في قلبي بقالها مكان وزهدت عينه الجمال اللي فات

*

وساعة ما نامت إديّه في إديك قالت لي عنيك:
قال لي كلام لسه عايش في دمي بيشرح لقلبي جمال المعاني
وبعد ده كله أشوفك بترمي آمالي في حبك وتطوي الأماني

*

وراجع تجدد حكايتك معايا
كفاية كفاية
*

كفاية الملامه وقول العواذل على حب ضايع ما دقتش هناء
يا ريتني ما شفتك ولا سمعت عادل بيحسد فؤادي على طول شقاء

*

كفاية عذاب في قلبي اللي داب

وشاف الهوان ولا ف يوم واسيته
لا شفتك داويته

بكلمة حنان

وأصحى ما أحسش لجرحي بآلام
وساكن بعيد عن جراح الغرام
في عز الليالي
ولا دموعي تجري

باريت اللي كان لي في حبك منام
وأشوف قلبي تاني مالهش أمانى
وساعة ما صورتك تمر بخيالي
لا يصحى لها فكري

*

ولا الشوق يجدد جراحي وأساي
كفايه كفايه

يا ضي العين

بدمعة حب حيرانه	رماها الشوق على خدي
بأشواقى اللي سهرانه	بأهاتي ينار وجدي
بنادي عليك	واحن إليك

يا ضي العين

في ليل الوجد والأشجان	مسهر شوقي وظنوني
أنام وأصحى على حرمان	وحرمانى بيكييني
وايه بعدك يسلييني	مدام قلبك مجافيني

يا ضي العين

هواك يا حلو كان غنوه	سمعها القلب غناها
لمح في عيونك الطلوه	معاني الحب وقراها
سهر من يومها خلاني	نسيت أهلي وخلاني

يا ضي العين

ربيع العمر ضيعته	في حبك أبكي وأتألم
وقلبي لما لوعته	سكت ماقدرش بتكلم
سمعت النوح في دقاته	وهو مداري آهاته
وادي انت راميه	بشوق لياليه

يا ضي العين

صرخة من أفريقيا

أخويا اللي عايش على أرضنا
على الكوكب اللي اشتكى مننا
أخويا الإنسان
في كل مكان
أخويا في أوربا في آسيا في كل الدول
في بطن الصحارى في سطح الجبل
في أي مكان
على الكوكب اللي اشتكى مننا
*

بتقتلني ليه
وليه أقتلك
ومين اللي قال لك حلال دمي لك
دنا أبقي أخوك
وأبويا أبوك
*

لحكمه اتخلفنا وبقينا شعوب
هدفنا الحياه
نعمر ونبني على أرضنا
على الكوكب اللي رواه دمنا
ومين اللي قال في سبيل الحروب
خلقنا الإله
على أرضنا
على الكوكب اللي رواه دمنا
أخويا اللي عايش على أرضنا
على الكوكب اللي اشتكى مننا
بعلمك بتصنع سلاح الدمار
وكل الغرض
ترمل مراتي وتقني الولد
أنا اللي قضيت الحياه في مرار
أقاسي المرض
ورغم دا كله أكافح واكد
أنا اللي من العلم حظي قليل
ولو مطرحك
أنور بعلمي طريقي الجميل

طريق يفرحك

سعادته وهنا

على أرضنا

على الكوكب الذي رواه دمناء

واحافظ بروحي على دمناء

على الكوكب الذي اشتكى مننا

ربيع الحب

فین ربیع الحب فین
والزهور دبّلت یا عین
فانتی للذکرى وراح
واللی باقیه لنا الجراح

فین ربیع الحب فین
مین یا قلبی کان رماک
عالمنا والسهد مین
غیر دموع السهرانین
ایه جنیتّه من هواک

مین یا قلبی کان رماک
ایه جنیتّه من هواک
عالمنا والسهد مین
غیر دموع السهرانین

بعث ود الّلی اشتروک
واشتريت الّلی باعوک
فین یا قلبی الحب فین
والزهور دبّلت یا عین
فات علینا یوم وراح
واللی باقیه لنا الجراح

فین ربیع الحب فین
لیه حنّکی عالّلی فات
هات یا قلبی کاسی هات
وانقضی ویا السنین
وانسی ماضی کان حزین

عیش معایا فی الخیال
واملا کاسک بالآمال
إحنا فین والحب فین
والزهور دبّلت یا عین
فات علینا یوم وراح
واللی باقیة لنا الجراح

فین ربیع الحب فین
وانت بالّلی خنت حبی
کنت عایش جوه قلبی
مستحیل حتّسوفه تانی
وسط جنّه من الأمانی

بعث جنّه قلّی لیه
روح بقی دورّ علیه
إنت فین وقلّبی فین
والزهور دبّلت یا عین
کان فی إیدیک یوم وراح
واللی باقیه لنا الجراح

فین ربیع الحب فین

قوللي قصدك مني إيه؟

جاي بتسأل عني ليه

قوللي قصدك مني إيه

أنت فاكّر قلبي لعبه

كل يوم تخلق له كدبه

قلبي حالف عالمحبه

مهما تتحايل عليه

قوللي

كنت فين أيام عذابي

مش كفاية راح شياي

لما داب الوجد قلبي

وانت ناسي حتى حبي

ياما ناديت لك دموعي

ياما قادت لك شموعي

أنت مش سامع نداها

وانت غاقل عن ضياها

كنت لما اسألها عنك

ما افكرتش مرة منك

تشتكي لي دموعها منك

كلمة للجرح تواسيه

قوللي

جاي بتسأل عن حناني

إنت فكرك قلبي تاني

إنت مالك بالحنان

يرضى يدملك أمان

قوللي إيه شفته في حبك

أوعى يوم عقلك يقولك

غير سهادي واشتياقي

إن حبك لسه باقي

مستحيل حنّسوف حناني

مش كفاية ضاع زمني

ولا دمة حب تاني

في الدموع وانت ناسيه

قوللي

الجزائر

ارقص يا نيل

ساعة الأصيل

والشمس راميه شعرها ورا ضهرها على صفحتك
راميه سلاسل من ذهب داب وانسكب في مبيتك
واللا الصبايا العطشانين متبعثرين على ضفتك
شطك يا نيل بيلمهم ويضمهم ويقول لهم
كلام جميل زيك يا نيل يروي العطاشى ف جنتك

غني يا نيل

وافرح يا نيل

واسكب يا نيل بين الربوع بدل الدموع خمرة فرح
واسقيني نشوة فرحتك واملا القدر بعد القدر
وانشد كمان لحن الأمان غنوه لآخويا اللي اتجرح
وبالكفاح لم الجراح والذل راح من أرضنا
طول عمرنا نزرع نضال لما النضال اليوم طرح
إحكي يا نيل
قول للنخيل

طول عمرنا على أرضنا نروي السلام من دمنا
وان مر غاصب من هنا نسقيه مرارة بأسنا
إحنا كده من صنع أوجاع الجوع من شعبنا
صهرتنا أهوال النضال طول السنين على أرضنا

*

غني يا نيل

وقول يا نيل

بعد النضال سنين طوال وبعد بيحيى كام شهيد
٢٠٠ شهيد ٢٠٠٠ شهيد مليون شهيد ولا يزيد
أرض الجزائر نورت واتحررت فيها العبيد
اسكب يا نيل واسقي الربوع بعد الخضوع لحن الحياة
خلي الجموع بين الربوع ترقص على رجع النشيد

بعد هجرك

وليه ترضى البعاد عني وحظي ضيعك مني	بحبك وانت روح الروح حياتي بعد هجرك نوح
*	
وعلمته يحب عنيك وضيعته وداب حواليك وسهرني ويكاني بكيت من كل وجداني وبرضه تروح وتهجرني وحظي ضيعك مني وقضيتها	جنيت عالقلب وظلمته شغلته عليك ولوعته ولما الشوق لعب بيًا بكيت من قلبي وعنيه وبعد النوح أبات مجروح حياتي بعد هجرك نوح ليالي البعد عديتها
ما بين سهدي وبين كاسي شباب عمري طواها الهجر يا قاسي يتوه الفكر ميت مره بعيد عن دنيتي المره	وأيام في العذاب تجري ما بين الثانية والثانية واشوف روحي ف حياة ثانية وأنسى النوح وانا مجروح بحبك وانت روح الروح
*	
وأعيش في الوهم متهني وليه ترضى البعاد عني	

كل يوم

كل يوم ابعت لقلبك رسائلين
أقول هاتوا لي من حبيبي كلمتين
كلمة أعرف منها ليه بس مجافيني
وكلمة أعرف منها إمتى حيصافيني

يرجعوا لي المرسلين

وف عنيهم دمعتين

كل يوم

في اللبالي والحبايب سهرانين
والهوى مضلل عليهم بالوداد
تبقي غايب والعواذل شمتانين
والدموع في عينه حركها البعاد

واشتكي لطيفك يا قاسي

وافتكرك فيك وانت ناسي

واسهر استنى بأمالي الكلمتين

يرجعوا لي المرسلين

وف عنيهم دمعتين

كل يوم

كل يوم أقول يادمع العين كفاية
بكره نفرح والهنا يملا قلوبنا
كل يوم أقول يا قلبي عيش معايا
ع المنى وابني ف خيالك أحل جنة

جنه فيها الحب غنوه

غنوه زي الحب حلوه

واللي أحلى من ده كله كلمتين

يرجعوا لي المرسلين

وف عنيهم دمعتين

كل يوم

صورة الشروق

كل الجمال في طلعتة
كحلّ عنه بفتنته
وقلبي رجّع غنوته
للمولى جلت قوته

*

خلى بساطها أطلسي
فوق القطيفة السندسي
نغم جماله ما يتتسي
بالحزن لحنه مكتسي

*

صفحة جمالها م الأزل
صوره تطوّل في الأجل
لون الخدود ساعة الخجل
زي ابتسامة الأمل

*

وفوق جبينك الندى
عمال تميل كذا وكذا
أبدع وصور كل دا؟
سبحانه يرهانه بدا

الفجر لاح الفجر لاح
والنور سرح بين البطاح
والديك سمعته لما صاح
آيه بديعة في الصباح

اللولي عالارض انتدر
قطر الندى زي الدرر
والطير بيصدق عالشجر
واللي الوليف فاتة وهجر

وفي السما منظر عجب
هنا الياقوت وهناك ذهب
ومن بعيد كان اللهب
والشمس بتشق الحجب

يا ورد نايم عالغصون
منظر بديع يسبي العيون
إيه الجمال دا ومين يكون
غير اللي أمره كاف ونون

معنى الحب

ولا أنت عارف معنى الحب
وانت اللي عايش من غير قلب

بتقول كلام عا الحب جميل
الحب له في قلوبنا دليل

فين الحنان اللي ف حبك
واللا القساوة اللي في قلبك
أنا عمري ما انسى
وبرضه لسه

بتقول كلام عالحب جميل!
بتقول بإن الحب حنان
هو أنت ناسي هجر زمان
إن كنت ناسي
ظالم وقاسي

تقدر تبين علاماته
ومنين حتعرف أماراته
عل خل غايب
زي الحبايب

بقول كلام عالحب جميل!
تقدر تقوللي الحب دا إيه
مين اللي قالك بس عليه
لا سهرت ليله
ولا دقت ويله

وتقول كلام!

بنّتي

ابنتي الحبيبة، أعرف أنني أكرمت في حقك قبل أن أكون مجرماً في حق المجتمع.

فإن جريمتي لم تضر المجتمع بقدر ما أضرتك أنت، أنت التي تحملت النتائج التي ترتبت على الخطأ الذي وقع فيه أبوك وليس المجتمع.

إنني أتخيلك تلعبين مع أترابك في الحارة، وأتخيل تلك الساعة الحبيبة إلى نفوس الأطفال جميعاً ساعة الظهيرة، ساعة عودة الآباء من أعمالهم. إنني أكاد أرى الأطفال وهم يتسابقون للارتقاء في أحضان آبائهم وهم يصيحون: بابا جه.. بابا جه.

أما أنت يا صغيرتي المسكينة، فتظلين قابعة في مكانك وقد غطت سحب الذل والانكسار سماء وجهك الصغيرة البريء.

أتخيلك وقد عدت إلى البيت في نلة وانكسار لتعديدي على أسماع أمك هذا السؤال التقليدي: "فين بابا يا ماما؟؟".

أنا هنا يا عفاف يا حبيبتي، هنا في العالم المجهول أكفر عن خطيئتي وسوف أعود، وحينما أعود سوف أعوضك عن تلك الفترة المظلمة التي مرت بك، وأضيء في نفسك الصغيرة أضواء الأمل، وإلي أن أعود يجب أن أقدم لك هذه التوبة؛ فهل تصفحين؟.

عفاف

الشوق يا عفاف دويني مشتاق لعنيكي يا بنتي	وبعادك بيعذبني لكن سجاتي غاليني
مشتاق لعبون عسلية علشانهم ضحيت روجي	أجمل م الفرحة شويه ولبست حديد في إديه
أنا عارف كبر جنابتي وحياتك أنا حشرحك	لكن ماكنتش دي غاييتي واحكيك كل حكايتي
بالليل كنت انتي في حصني وصحيت على صوت اناك	وشفايفك نابمة في ودني مذهول والخوف برعدني
وبسرعة ندهت طبيب حط السماعة وقاللي	يكشف على أغلى حبيب مرضك في القلب رهيب
ودواكي اللي وصفهولك كان لازم أحضرهولك	في روسته عريضه طويله على طول في ثواني قليله
واحترت يا بنتي في أمري كان ممكن اضحي بعمري	وجريت زي المجنون والعمر علي يهون
علشان أحميكي يا حلوه لو حتى أسرق بالقوة	من داء ملعون جبار لو حتى أخوض في النار
واتمدت غصبن عني ولا كنتش عارف إني	إيدي على مال الغير بأعمل غير فعل الخير
أنا عارف حيعايروكي ويكرهوا قلبك في	بجريمتي وبذلوكي ويقولوا شفاكي أبوكي
مظلوم وحياتك عندي لا في حد يحبك قبلي	وهناكي منايا وقصدي ولا حد يحبك بعدي

بابا

ابني الحبيب: من وراء القضبان أبعث إليك بألف قبلة على جبينك الصغير، أنت معي يا صغيري الحبيب في كل لحظة، ولكن ليس بجسدك الحبيب، فأنا أدفع حياتي ثمنا لتأمين مستقبلك وإبعادك عن هذا المكان الرهيب، إنك معي بطيفك يا صغيري الأوحـد يا سلوى نفسي ويا محط آمالي، لا يفارقني طيفك المحبوب أبداً، لا في اليقظة ولا في الأحلام، إنني أتخيلك دائماً تبحث عني بعينيك البريئتين في كل وقت ومكان؛ ولكن معذرة يا صغيري الحبيب لقد كان بودي أن أكفيك عناء هذا البحث ولكن الأمر خارج عن طوقي.

ابني الحبيب.. أعلم أنني في نظرك بطل قادر على صنع المعجزات، فإنك لم تتعود مني إلا إجابة طلباتك كاملة غير منقوصة، ولكن البطل قد كبا يا صغيري الجميل، وكانت الكبوة قاسية حتى لقد فقد معها توازنه، وفقد معها السيطرة على نفسه، وها هو ذا يا حبيبي الصغير يريض خلف القضبان مسلوب الحرية والإرادة.

حبيبي.. أعلم أنك تتألم وتعيش في فراغ رهيب وأعلم أن فكرك الصغير يسبح في آفاق بعيدة هي أكبر منك ومن تفكيرك، وأعلم أن ذهنك المكـدود قد عجز تماماً أمام علامات الاستفهام الكثيرة التي تتراقص أمام عينيك الصغيرتين. إنني أكاد أميز نبرات صوتك الرقيقة وهي تقول:

بابا

أبدا بابا في بالي عالمسريير بارد وخالي	وخيالك في خيالي جنبي بابا مطرحك
*	*
أنا جسيته وسابت وانت باباب ياللي ساكت	من عيوني دموعي سالت إمتى بابا يفتحك
*	*
وانت يا سلم يا سلم وانت يا بيتنا المظلم	ليه درابزينك مبلم إمتى بابا ينورك
*	*
وانت يا شارع يا شارع واللي نزلك شفته طالع	إلى خدته رد راجع حاجة بابا بتمنعك
*	*
حاجة جوه ولا بره حاجة مهما تبقى مره	حاجة نفسي اعرفها مره علمي يمكن ينفعك
*	*
العيال بيخوفوني والدموع اللي في عيوني	يا عذابي من ظنوني آه يا خدي بتجرحك
*	*
أنا لا بتهيني لعبه وأنت يا شمل الأحبه	ولا بتسليني كدبه إمتى بابا بجمعك
*	*
أنا بافهم فهموني يا الغطا اللي فوق عيوني	يا كبار ما تفهموني إمتى بابا برفعك
*	*
بالكلام دا اللي بقوله بالكلام دا اللي بقوله	إمتى بابا يطوله إمتى بابا بسمعك
*	*
أنا جسمي كله دايب إنت ليه يا بابا غايب	من غيايب سيد الحبايب حد جاي هنا مطرحك؟
*	*
ماما بتقول وتغير آه يا جسمي الصغير	حاجة تحير تحير كل حاجة بتوجعك

عيد الأم

بحر الحنان اللي سقاني	وأنا لسه جنين
لحن الأمان اللي شجاني	أيام وسنين
من صوت حبيب يملا وداني	أنغام ورنين
وقلب بالعطف رعاني	طب تبقى دي مين؟

*

مين اللي سهرت لياليها	والكون نعسان
تمسح دموعي بأياديها	ويكل حنان
مين اللي بهجة أغانيها	تملا الوجدان
مين اللي وصتنا عليها	كل الأديان

*

مين اللي جرحي في بسمتها	ببلاقي دواه
مين اللي لو أسمع صوتها	أسرع وياه
مين اللي بتغيب سعادتها	لو قلت الآه
مين اللي واجب عبادتها	من بعد الله

*

مين اللي صورتها في قلبي	كل الأوقات
مين اللي تستاهل حبي	قبل الإخوات
مين اللي مش ممكن أخبي	عنها بالذات
ومين وسيلتي إلى ربي	وقت الدعوات

*

أمي الحبيبة أنا اعبدها	ودا موش إلحاد
واهديها غنوة تمجدها	كلها إنشاد
والغنوة قلبي يرددّها	وأنا اقول منعاد
يارب هنيها بعيدها	عيد الأعياد

طلب مصباح من السيد مدير السجن

بدأت أكتب ملحمه	عن ثورة الشعب العظيم
ولئلا عندك مظلمة	يا حضرة الأب الرحيم
أوضعتي تمللي مضلمة	إيعت لي لمبه يا كريم
دي تبقى هي المكرمه	وهوا دا الفضل العميم

غن يا بلبل

عقب فوزي في مسابقة مجلة السجون لعيد الأم، كرمني السيد العقيد إبراهيم عزت مدير منطقة القاهرة، وفي حفلة التكريم التي أقامها لي سيادته بمسرح سجن القاهرة، ألقىت هذه القطعة والتي تليها:

غني يا بلبل قول أنغامك قول سمعني صدى الألحان
وانت يا ورد يا نايم صحصح وارقص ياللا على الأغصان
نعسان ليه ياجميل على غصنك إصحى وغني مع الكروان

وانتي يا فرحة ارقصي حوالياً
وانتي يا دنيا اضحكي في عنيه

عشنا وشفنا في عهد الثورة الدولة بتعطف عالفنان
*

أنشر ياللا يا فن راياتك وارفع راسك فوق في العالي
خلي الضلمة تروح وتولي خلي النور في بلادنا ياللي
عشنا وشفنا يافن اليوم اللي استتينا صباحه ليالي

ياما يا فن قسينا وياما
كنا في قلب بلدنا بتامى

صبحت لينا مكانه كريمه في قلب وطننا الحر الغالي
الفنان أنشوده رقيقه وغنوه معانيها الإحساس
الفنان بيدوب في دمعه لجل ينور دنيا الناس
الفنان رمز البشرية مهما اتعددت الأجناس

الفنان راهب مسكين
يشقى عشان يسعد ملايين

يسقي الناس من روحه الصافية ويشرب هو مرار الكاس

*

غني يا بلبل وانت يا إمري قول أناشيدك والأنغام
أنا حكيت لك وانت تغني أجمل معنى وأحلى كلام
قول لمديرتنا الفن بيهدي أحلى تحية وأزكى سلام

كان مجروح وانت اللي داويته
لما عطفت عليه ورعيته

كان مظلوم وانت اللي نصفته وعليت رايته مع الأعلام

"أنا فرحان"

أنا م الفرحة يا ناس نشوان أنا فرحان أنا فرحان	أنا فرحان مش قادر أخبي أنا مش طايق فرحة قلبي
*	
دفتوا حلاوة الفرحة معايا وأنا في الزابحه وأنا في الجايه	أنا فرحان وإنتم إخواني ميت مبروك سمعتها وداني
*	
أهي دي القوة اللي حتسندني فرحكو هو اللي ببسعدني	أهي دي الجايزه اللي تهنييني عطفكو هو اللي يقويني
*	
لجل ما ارد ف يوم جمابلكم قلبي وروحي بين أناملكم	أنا مش عارف أعمل إيه عايزين إيه دلوني عليه
*	
ينهي المحنة ويشفي جراحنا ميت مبروك بزوال المحنه	وأنا من قلبي بسأل ربي لجل ما اقولها لكم من قلبي
*	
والكروان ينشد ألحان أنا فرحان أنا فرحان	يومها الجرح يلاقي دواه وأنا من قلبي حقول وياه
إنت يا حامي حمى الفنان إنت الأبوّة حنان في حنان	وانت يا عزة كل اديب أجيب منين لك وصف قريب
*	
قوللي يا بسمه لكل حزين عشرين سنتي يساع ملايين؟	قوللي يا موئل للمساكين جبت القلب دا كله منين
*	
لجل تفرّج كل حزين أكبر من دنيا الزنازين	نفسى أشوفك تبقى وزير علشان قلبك أصله كبير
*	
والكروان ينشد ألحان أنا فرحان أنا فرحان	يومها الجرح يلاقي دواه وأنا رح اغني واقول ويّاه
*	

هدية سجين لأمه في عيد الأم

باللي الحنان من بسمتك عيالي يامه وصيتك	عبدك هنايا وفرحتي هما السنادي هديتي
*	
سميره أُملي ومنيتي وحسن منايا ف دنيتي	راعيتها دايمًا بالحنان ما تخليهوش ييات جعان
*	
ومجدي غذيّه باللبن دي الحسبه ما تزيد عن شلن	إلواد ياقلب ابوه ضعيف رطل اللبن ويا الرغيف
*	
والبت ليلي والنبي وان كنتي لازم تضربي	من أي حاجة بتتلوي بالراحة يامه مش قوي
*	
وان كانوا دايمًا يسألوا ما تخليهمش يزرعوا	عني قولي لهم في البلد وحياة معزة الولد
*	
والصبح ساعة المدرسة فيه عندي فكره كويسه	طبعًا ضروري يصرفوا من غير ما هما يعرفوا
*	
ساعتي بيعيها والبدل بس المهم وبالعجل	والراديو لو حوجت بيعيه مصروف عيالي دبريه
*	
ما تخليهمش محرومين دنا لما اشوفهم مبسوطين	دول كل أُملي ف دنيتي ح تهون عليّ حبستي
*	
ومن عنيه هديتك أما السنادي وصيتك	أول ما انول حرיתי عيالي يا مه هديتي

سجين يناجي أمه في العيد

مالنا يا أمي ومال العيد
خلي العيد لصحاب العيد
عيد ازاي طول ما احنا بعيد
بيني وبينك سور وحديد

والقضبان زي الغريان
ليل ونهار واقفين ددبان
دنيا كئيبة سواد في سواد
حتى النور لون القطران

والزنازين أشباح واقفين
زي الموت ساكتين واجمين
والسجان بينهم حيران
ماشي يعد بقاله سنين

يبقى دا عيد؟
وابقى سعيد؟
خلي العيد لصحاب العيد
كان من عيني يا أمي يا غاليه

أجري واجيب لك أغلى هدية
واسعد قلبك داللي رعاني
طول أيامي بالحنينه

كنت اتمنى أكون وياكي
يوم العيد افرح لهنّاكي
واشعر مرة بأني وهبتك
لحظة فرحة واعيشها معاكي

كان من عيني وكنت اتمنى
أفرح من فرحك واتهنى
وانعم يوم العيد برضاكي
لكن الدهر القاسي غدرنا

يبقى دا عيد؟
وابقى سعيد؟
خلي العيد لصحاب العيد

ليل ونهار يا حبيبتي يا أمي
عاش ويا دموعي وندمي
حاسس إني جنيت على قلبك
ودا بس اللي مزود همي

حرمانك بيسبب غلبي
ويكثر أحزاني ف قلبي
ويسهرني ليالي كئيبه
أتقدم على طيشي وذنبي

سيد جاب لامه الفستان
ومحمد جاب طرحه كمان
وأنا يا حبيبتي ما جبتلكيش
غير الحسره والأحزان

يبقى دا عيد؟
وابقى سعيد؟
خلي العيد لصحاب العيد

سجين يخاطب العيد

إيه يا عيد؟

جاي ليه؟

زي عادتك والا إيه؟

جاي تصحي الذكريات

واللي فات؟

ما تحاولشي

قلبي مات

*

والأمانى ف قلبي ماتوا

م الجراح

حتى أجمل ذكرياته

كله راح

راح في آهات الندم

في الألم

م الجراح اللي ما حدش لمها

الجراح اللي بتنزف دمها

م الآهات

قلبي مات

*

مات يا عيد ما عدش حي

وانت جي؟

جي ليه؟

روح يا عيد

روح لغيري وسبيني اعيش في محنتي

في دنيتي

دنيتي اللي كل أيامها عدم

دنيتي اللي كل آهاتها ندم

دنيتي اللي كل ساعاتها ألم

*

روح يا عيد

روح لقلب يكون سعيد

وابتعد عن الحديد

الحديد اللي ملازمني

زي صورة العيال

ليلی وحسین وامتثال
لما حاش النسمة عني
والجمال
إيه يا عيد
جي ليه
لو صحيح جي تَجاملني
روح وطمَن العيال
ليلی وحسین وامتثال
قول لهم أبوكو حيّ
مهما حبطول الأنين
والسنين
بكره جي .. روح يا عيد

السجان

أنا حنين أنا حنين وظلم الغير ما هوش هين	وقلبي بالحنان ملين على نفسي دنا إنسان
آهات الناس تبكييني وفرّج الناس يهيني	وجرح الناس بيئلمني وحرمانهم بيحرمني
وديك اليوم لقبت سجان وحاطط جزمته الحيوان	ماسك مسجون راميّه عالارض على قلب السجين بالعرض
كأنه ماجور بيعجن فيه وصاحبنا اللي هو راميّه	ولسه غشيم بيتعلم نايم في الأرض ومسلم
جبان والذل في طبعه وطننا كده وده شرعه	وياما شاف هوان ياما مافيش مسجون وله كرامه
وأقسم إني ما حنيت أنا اتلبّشت واتخضيت	ولا اتألمت للمسجون على سجان غبي مجنون
ما نفرض إنه مات في إديه حبلقوا القبض دوغري عليه	خصوصا إنه راجل كهل ويصبح من ضحايا الجهل
وانا ف رأيي انه مش غلطان وليه مانكونش ناس شجعان	إذا دورنا عا الدافع ونهرب ليه من الواقع
حيعمل بس كده من إيه يا إما جهل عامي عنيه	سكتوا ليه ما بتدروش؟ يا إما عياله مافطروش
سمعنا كثير عن الإصلاح أنا اتمنى لها كل نجاح	وإصلاح السجون غايه وكل الشعب ويايا
وإصلاح السجون دا إيه نعليّ الحيط ونرفع فيه	نصلح يعني في الجدران؟ وننسى مستوى السجان؟
إن كان دا إصلاحكم	ودي الخطة اللي موضوعه

كفاية ربحوا رواحكم

دا نفخ في قربه مقطوعة

صحيفة "الفيش"

سيد حسن بدران
خارج من الليمان
من بعد حكم طويل
عدمان وجسمه هزيل

*

ماشي ولا الأموات
وشه عليه علامات
ضهره حناه الهم
فيها الكدر والغم

*

ياما طلع أعوام
وانهد حيله قوام
يكسر جبال الصخر
والصخر هو الصخر

*

جبل عنيد جبار
بيهد في الأعمار
صخوره لم تتعد
وهو ما بينهد

*

ياما بلع مساجين
تحت الحجر نايمين
فین الرفاقي فین
هاتي الدموع يا عين
فینك يا عم دياب
اتفرقوا الأحباب
طلعوه ولا نزلوش
والأهل ما يدروش
فین صحبة المحنة
وابكي علينا احنا
فینك يا شيخ بكري
والعمر فات يجري

*

أروح لمين يا ناس
وأنا في دنيا الناس
ومين يصون الود
غريب ومالي حد

*

قرص عليه الجوع
لا بيرحم الجربوع
والجوع عدو شرير
ولا يطيقه وزير

*

نفسه بعيش في حلال
كل اللي راح له قال
يكسب رغيف العيش
لازم صحيفة الفيش

*

وصحيفته فيها كثير
سرقه على تزوير
أشكال على ألوان
وهتك عرض كمان

*

حفيت خلاص رجليه
ما حد حنّ عليه
وجلد كعبه داب
واتقفّلت لبواب

*

والدمع منه سال
وبأعلى صوته قال

سيد مشى حيران
وقف في قلب ميدان

*

ساخط عليًا ليه
ما تقوللي أعمل إيه

يا مجتمع يا عجيب
أمرك معايا غريب

*

واكتب لتويتي حجاب
قافل في وشي الباب

عابزني اتوب ازاي
وانت سبب بلواي

*

من بعد حكم كبير
عازم على التكفير

خرجت م اللومان
على غلطتي ندمان

*

وابعد عن الإجرام
وسطوه الأحكام

نفسي أعيش في أمان
عن قسوة السجان

*

أكسب رغي في حلال
واعمل لي بيت وعيال
وابني في أركانه
بيهد بنيانه
تقولي شغل ما فيش
واملا صحيفة الفيش

كل الأمل يا ناس
والبس في رجلي مداس
واعيش في بلدي كريم
مش لص جاني أثيم
أقول لكم معذور
حسرق وأنا مجبور

*

أكسر جبال الصخر
مدام قلوبكم صخر

وارجع على اللومان
واستعطف القضبان

*

أرحم كثير منكم
يمكن يزيد عنكم

والله دا السجان
برضه في قلبه حنان

*

واكل وانام وأعيش
من غير صحيفة الفيش

هناك حلاقي العيش
والبس وماله خيش

يا مدير السجن

نظمت هذه القطعة للسيد مدير السجن بسبب رفض الإفراج عني بربع المدة وكان لها أثر طيب حيث أفرج عني في نفس الشهر الذي نظمت فيه هذه القطعة.

يا مدير السجن نظره	للعلاية المحرومين
عيشتي جوه السجن مره	واللي بـره تعبـانين
الحياة قاسيه عليهم	والمرار كله شافوه
باعوا كل اللي في ايديهم	والشرف يمكن باعوه
حكمي أصله ثلاث سنين	شغل من غير ملحقات
من سنة ٥٩	يعني عفو الربع فات
سيرى وسلوكي حميد	والسوايق لأ مفيش
عمري ما مسكت الحديد	زي بليه أو عميش ^(٢)
واللي فايتهم ولايا	والثواب فيهم حلال
والديوان عاتد معايا	ذنـبهم إيه العيال
ليه ديوان عام السجون	يرفض الإفراج يا بيه
هو أنا أرسين لوبين	ولا إيدن أو موليه؟
هما دول المجرمين	إللي حبستهم حلال
هما دول السفاحين	دول يروحوا الإعتقال
أما محسوبك فقير	حتى يخاف من خياله
بس اهي غفلة ضمير	شقلبت عقله وحاله
وانت أب ولك عيال	ربي ما يورك فراقهم
رجع اللي بخته مال	للعيال تكسب ثوابهم
المكاتب تحت أمرك	قول لهم يستعلموا لي
وانت صاحب فضل عمرك	باما ناس عنك قالوا لي

^(٢) اعتاد عتاوله المجرمين إذا ضايقهم أحد أن يمسكوا بالحديد الممتد فوق العنابر ويدلوا أجسامهم مهددين بالانتحار بإلقاء أنفسهم من أعلى، وأنا هنا أنفي عن نفسي هذا التصرف تأكيدا لحسن سلوكي، و"بليه" و"عميش" من المجرمين بالسجن.

عيد القيامة

في احتفال السجن بعيد القيامة أقيمت هذه القطعة مشاركة لإخواننا المسيحيين.

النسيم بيداعب الزهره الجميله
لجل ينعش كل أيامها القليله
والبلابل غردت فوق الخميله
والروابي هزها اللحن البديع
إيه دا كله إيه دا كله يا ربيع؟!

*

الوجود صحصح مع الفجر الجميل
يملا كاسه من هوا الصبح العليل
والهوا مطرح ما يسري الكون يميل
حتى هام النخل مال ويًا الجميع
من جالك يا جمالك يا ربيع
الجمال جدد شبابه واكتمل
والنفوس بالبشر فاضت والأمل
واللي جرحه مغليه طاب واندمل
والحياب ودعوا عهد الدموع
إيه دا كله إيه دا كله يا ربيع؟!

*

المسيح بالحب والخير والسلام
عطر الأجواء وشرع للأنام
والوجود بيحتفل في كل عام
بالمسيح اللي مسح عنه الدموع
ذكرى بتزود جمالك يا ربيع

*

إنت عيد الحب في كل الوجود
من قديم العهد من عهد الجدود
مش كفايه انك معطر بالورود
لأ وزاد العطر أعياد اليسوع
إيه دا كله إيه دا كله يا ربيع

خواطر ليلة الإفراج

أهلاً يا نسيم الحرية
بس أوعى هواك يلعب بيّا
والقى الأيام تقسى عليّا
وأفضل دنيا العبودية
مشتاق لك والله بوجداني
ويهد اللي بنيتّه تاني
واسرق من قسوة حرمانى
وارجع لحديدي وقضبانى

*

آدم كان عايش في الجنة
لو يطلب شيء أو يتمنى
مع ذلك أخطأ واتجنى
مش عارف ليه بس وطننا
ونعيم الكون عايش حواليه
في ثواني قلبه يكون في إديه
والمولى تجلى بتوبته عليه
بيخاصم إنه المخطئ ليه

*

هدوا لي العش اللي بنيتّه
وقاسيت في السجن اللي قاسيته
وكفايه الذل اللي لقيته
مع إن الذنب اللي جنيته
وينيت ويّاه كل أمالي
ولا حدش حن على عيالي
وسهرت مع الذل ليالي
كان ذنب ظروفى وأحوالى

*

العش ألمّه بكفاحي
وح اداري عليهم بجناحي
واسهر عشانهم صباحي
بس انتو سلبتوني سلاحي
وح ألمّ عيالي وانبيهم
ولا اخليش حد يكلمهم
وامسح بحنان قلبي ألامهم
خايف للسجن أسلمهم

الوداع

"ألقيت هذه القطعة في الندوة الثقافية قبل الإفراج عني بيومين فقط"

بعد ما جفت دموعي م الأتئين ثلاث سنين
لسه شايل بين عيوني للزميل دمعتين

التقيت الدمع ضاع
قلت احوشهم للوداع

حتشوفوهم فوق خدودي بعد يوم ولا يومين

*

بعد أيامي اللي ضاعت في مجاهل محنتي
بعد ما عشت في الفراغ مع وحدتي

نفسى أقول كلمة وداع
للعدم..... للضياع

للحديد اللي زاملني وكان بيسمع شكوتي

دنيا برضه مهما كانت كان لي فيها ذكريات
مستحيل انساها عمري لو نسيت كل اللي فات

برضه كان فيها جمال
رغم أيامها النقال

شفت جنب القسوة فيها قلوب تدويها الآهات
شفت فيها ناس كتير كانوا ضحايا المجتمع
الظروف مدت إديهم مش خيانه ومش طمع

واللي أهله ضللوه
واللي أصحابه غووه

واللي يائس واللي يائس كل دا فيها اجتمع

*

الوداع ياللي رعيتتي بالحنان وغمرتني
وانت ياللي من قساوتك م الحنان حرمتني

مش حقول شيء يوجعك
برضه لازم أودعك

دانت برضه من قساوتك للحنان شوقنتني

*

الوداع كل اللي عايش من ورا السور الكبير
يا رفاقي في الشدايد يا زمايل في المصير

انتو حته من حياتي
انتوا أوجع ذكرياتي

ذكريات مشيت في قلبي	مشية الشوك عالحرير
الوداع مصحوب بأجمل	أمنيات قلبي الحزين

الوداع من كل قلبي
واحترامي وكل حبي
دول هديه مني خالصة للي يعطف عالسجين

*

الوداع الوداع	نفسى أقول كلمة وداع
للي حاضر واللي غايب	واللي صامد للنوايب
واللي محروم م الحبايب	واللي نسيوه القرايب
واللي عن أولاده غايب	واللي عايش في الضياع

الوداع... الوداع

"الأوضة"

بعد خروجي من السجن أقمت في حجرة مصنوعة من الخشب لا تقي من الحر ولا البرد علاوة على ما تحويه من حشرات، وقد أزعجت لها هذه التحية من باب الوفاء.

يا أوضه أنا منك قرفان	إلهي بيعت لك بمبة
في الصيف جهنم ولا أسوان	وفي الشتا زي أوربا
والقملة فيكي تجر حصان	والبق فيكي بيتربى
خليتي عيشتي ولا القطران	وغلبي ما بقاش يتخبى
محتار في حرك وف بردك	دا حال منبل مش نافع
الله يزلك ويهدك	ويرموا خشبك في الشارع
يا أوضه ملعون أبو جدك	دنا اسكن احسن في الجامع